

每週經課朗誦經文(巴克禮台語漢字)2013/07/21

共同經課 - 1 阿摩司書八章一節~十二節

1 主耶和華互我看見一項：我看見一筐夏天的果子。2 伊講：「阿摩司啊，你看見甚麼？」我講：「看見一筐夏天的果子。」耶和華就對我講：「我的百姓以色列的末期到啦，我的確無閣寬恕 in。」3 主耶和華講：「彼日，宮殿的唱歌欲變做啼哭；欲有多多身屍佇逐所在穴擲，人攏靜靜。」4 恁諸個愛吞食喪鄉人、互此所在的困苦人衰敗者，著聽此個話！5 恁講：月的初一甚麼時過去，互阮通糶五穀；安息日甚麼時過去，互阮通賣麥；用細的伊法，用重的舍客勒，用詭詐的天秤來騙人，6 通用銀買喪鄉人，用一雙鞋換窮赤的人，將歹的麥賣互人。7 耶和華指雅各的榮華來咒誓講：in 攏總的所做，我永遠無袂記得。8 此個地豈無欲因爲按呢來搖滄？倚起彼中間者豈無欲悲哀嗎？此個地欲親像大河漲起來，也欲振動退低親像埃及河。9 主耶和華講：到彼日，我欲互日頭佇日中晝就落去，互地佇當頭白日變黑暗。10 我欲互恁的節期變做悲哀，歌曲攏變做哀歌。欲互眾人腰緒麻布，頭殼無半支毛，閣互伊悲哀親像死孤生的子，到尾親像痛苦的日一樣。11 主耶和華講：看啊，日子欲到，我欲互飢荒到佇此所在。飢荒毋是因爲無餅，嘴乾毋是爲著無水，就是因爲無通聽耶和華的話。12 in 欲四界去，對此個海到彼個海，對北到東，走來走去，尋求耶和華的話，亦尋無。

共同經課 - 2 詩篇五十二篇

1 [以東人多益來報掃羅講：「大衛到亞希米勒的家。」彼時，大衛做此個教示的詩，交互樂官。] 勇猛的人啊，你啥事爲著做歹來誇口？上帝的慈愛永遠佇啲。2 你的舌圖謀邪惡，親像利的剃頭刀，行奸詐。3 你愛歹贏過愛好，愛白賊，贏過愛講義理。(細拉) 4 詭譎的舌啊，你愛講一切吞食的話！5 上帝亦欲毀壞你，到永遠；伊欲掠你，對你的布棚中 出來，對活人的地將你拔出來。(細拉) 6 義人欲看見來驚惶，亦欲笑伊，7 講：看啊，這就是彼號無掠上帝做伊的氣力的人，是倚靠伊的錢財的罪，佇邪惡家已倚在。8 論到我，我是親像上帝厝內青翠的橄欖樹；我永永遠遠倚靠上帝的慈愛。9 因爲你行這，我欲感謝你，到永遠。我亦欲佇你聖的百姓的面前向望你的名；因爲伊的名是好。

共同經課 - 3 歌羅西書一章十五節~二十八節

15 伊是袂得通看見的上帝的像，伊是頭一個生的，佇攏總受創造者的代先。16 因爲萬物佇伊來創造，佇天裡，及佇地裡的；有通看見，及無通看見的；或是座位的，或是治理的，或是辦政事的，或是掌權的；萬項有攏是對伊，也爲著伊才受創造。17 伊佇萬項有的代先；萬項有恁佇伊來相及倚在。18 伊是身軀的頭，身軀就是教會。伊是源起頭，對死人中起來的頭一個生的，互伊佇萬項有中做第一。19 因爲父歡喜互一切的豐盛恁佇伊。20 已經將伊十字架的血來成就和平，就對伊互萬項有及伊本身閣再和——或是地上的、或是佇天裡的——攏是對伊。21 閣恁平素佇歹的所行及上帝隔斷，心內做對敵。22 今伊佇伊肉體的身軀對伊的死，已經互恁閣再和，欲互恁諸個成聖，無瑕疵、無通嫌的，倚佇伊的面前。23 若恁長長恁信，有地基閣堅固，無受搖動，來離開福音的向望。這福音就是恁所曾聽見的，閣是傳佇天下攏總受創造者的中間，我保羅已經設立做伊的差用。24 今我爲著恁受諸個艱苦，是歡喜；我爲著基督的身軀，就是教會，佇我的肉體補滿伊所未有盡的患難。25 我設立做此個教會的差用，照上帝爲著恁所交付我的職份，來圓滿上帝的道理，26 就是萬世萬代以來所因密的奧妙；今已經顯明佇伊的聖徒。27 上帝愛欲互 in 知此個奧妙的榮光佇外邦中有倞富有，就是基督恁佇恁，做榮光的向望的；28 阮傳伊，用逐樣的智慧苦勸逐人，教示逐人，欲獻逐人恁佇基督來完全。

共同經課 - 4 路加福音十章三十八節~四十二節

38 in 行的時，耶穌入一個鄉社。有一個婦仁人，名馬大，接納伊佇伊的厝。39 伊有一個姊妹，叫做馬利亞，坐佇主的腳下來聽伊的話。40 馬大因爲接待 in，代誌多，心忙，就近耶穌，講：「主啊，我的姊妹放我家已啲摸，你無要緊嗎？著教伊來助我。」41 若是主應講：「馬大啊！馬大啊！你爲著多多代誌掛慮紛雜，42 若是所欠用的是一項若定；因爲馬利亞已經揀著好的份額，就是袂給伊搶得的。」